

*Presentazion ai 22 di Fevrâr tal Auditorium Regjonâl a Udin. Pronts i prins volums pai insegnants*

## **Furlan a scuele: al nas il Centri di Documentazion, ricercje e sperimentazion didattiche**

Grandis novitâts pal insegnament dal furlan a scuele: **Docuscuele**, il gnûf Centri di documentazion, ricercje e sperimentazion didattiche **nassût di une intese tra la ARLeF - Agenzie Regjonâl pe Lenghe Furlane e la Societât Filologjiche Furlane**, daûr de volontât dal Assessorât regjonâl ae Istruzion e cul supuart dal Uffici Scolastic Regjonâl, al môf cun di fat i prins pas. Ma a son za stâts fâts progrès stant che ae sô presentazion **miercus ai 22 di Fevrâr aes 16.30, tal auditorium de Regjon FV-J in vie Sabbadini, a vignaran dâts fûr a ducj i insegnants, che a saran presints, 5 fassicui facii di doprâ cun unitâts didatichis par furlan za prontis e che si puedin sperimentâ in ognidune des classis de scuele primarie. I insegnants a spietin une vore ducj chescj materiâi, par vie che la domande di insegnament de lenghe furlane a scuele di bande des fameis tai ultins agns e je cressude, rivant al **73 par cent**, e si fevele di **43 mil students**. **“Marilenghe te scuele”**, al è il non di chescj fassicui che a metin dongje une schirie di esperiencis didatichis inovativis, e al è un lavôr che al da ai docents un esempi concret di buinis praticichis che a puedin jessi di jutori ae creativitât personâl par meti in vore gnûfs svilups di insegnament.**

Il compit di Docuscuele al è propit chel di sburtâ la difusion di buinis praticichis e il confront fra i insegnants; il so inviament al vignarà saludât, scomençant aes 16:30, dai intervents di dutis lis istituzions che a àn volût cun fuarce chest progjet: **Loredana Panariti**, Assessore ae Istruzion de Regjon Friûl-Vignesie Julie; **Pietro Biasiol**, Dirigjent titulâr dal Uffici Scolastic; **Lorenzo Fabbro**, President de ARLeF; **Federico Vicario**, President de Societât Filologjiche Furlane.

Aes 17.00 **Walter Tomada**, President dal Comitât Tecnic di Docuscuele al presenterà il Centri. Di chest organism e fâs part ancje **Rosalba Perini** che, po dopo, e presenterà i 5 fassicui di “Marilenghe te scuele”, spiegant i percors didatics in lenghe furlane studiâts par ognidune des 5 anualitâts de scuele primarie. Aes 17:30, cualchi model di unitât didattiche al vignarà proponût ai insegnants dai stes autôrs: Miriam Pupini pe classe I, Giuliana Tommasini, Luigina e Cristina Santi pe II, Lorella Moretti e Sandro Fabello pe III, Nicola Tosolini pe IV e in fin Monica Medeot pe V.

1/2

### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: arlef@caltpr.it**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

A ducj i insegnants ur vignarà dade copie dai fassicui di “Marilenghe te scuele” e l’atestât di partecipazion al incuintri (iniziative di formazion increditade daûr des Liniis Vuide MIUR 2016-2019).

Par cuistions organizativis si domande di segnâsi **dentri di sabide ai 18 di Fevrâr** scrivint une mail di conferme a: [info@scuelefurlane.it](mailto:info@scuelefurlane.it)

Il Centri di documentazion ricercje e sperimentazion didatiche pe scuele furlane al à sede li de Societât Filologjiche Furlane Palaç Mantica, vie Manin 18 - 33100 Udin e al è viert di lunis a vinars des 9 aes 13 e su apontament tel. 0432.501598 (int. 5).

*Udin, ai 10 di Fevrâr dal 2017*

#### INFORMAZIONS PE STAMPE - INFORMAZIONI PER LA STAMPA

**Ufficio Stampa ARLeF** CALT relazioni pubbliche Tel. + 39 0432 229127 / **e-mail: [arlef@caltpr.it](mailto:arlef@caltpr.it)**  
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<